

03 DEC 2002

PENDUDUK DAN KELUARGA SETINGGAN TETAP MENGUTAMAKAN IBU BAPA

KUALA LUMPUR, 3 Dis (Bernama) -- Kajian Lembaga Penduduk dan Pembangunan Keluarga Negara (LPPKN) terhadap penduduk di kawasan setinggan mendapati anak masing-masing masih mengutamakan ibu bapa dan keluarga walaupun tinggal berasingan.

Kajian "Penduduk dan Keluarga Setinggan" itu membabitkan 1,038 responden wanita berusia melebihi 15 tahun dan berkeluarga dari beberapa kawasan setinggan di Kuala Lumpur, Petaling Jaya, Johor Baharu, Ipoh dan Sungai Petani.

"Walaupun 90 peratus ibu bapa dan mentua tinggal berasingan, kajian menunjukkan kebiasaannya anak-anak akan pulang apabila ibu bapa mereka memerlukan penjagaan sewaktu sakit," demikian menurut kenyataan LPPKN di sini hari ini.

Sebanyak 80 koresponden juga kerap menghulurkan wang tunai kepada ibu bapa masing-masing.

"Nilai kekeluargaan yang utuh dan mesra jelas dilihat daripada hasil kajian ini yang menunjukkan responden semakin kerap berjumpa dengan ibu bapa yang semakin lanjut usia," menurut kenyataan itu.

Hasil kajian itu juga memberikan harapan kepada kerajaan mencapai matlamat kempen "Utamakan Keluarga - Semakin Hari Semakin Sayang" yang dilancarkan Perdana Menteri Datuk Seri Dr. Mahathir Mohamad pada 31 Julai lepas.

-- BERNAMA
UHS RZS LAT